



23. oktobari 2024

UKA2024/53-127

**Namminersorlutik Oqartussat, Kommunillu sanaartugassanut aningaasartuutissaaninngaanniit ukiumut 1%-mik, pisortat sanaartugassaartaannut immikkut toqqakkanut kusassaanermut aningaasaliissuteqartalernissaq, kusassaanermilu eqqumiitsuliortunik suleqateqartalernissaq pillugu Naalakkersuisut inatsimmik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Sanaartugassani kusassaanermi sanaartukkap silataata, iluatungaatalu kusassarneqartarnissaat matumani pineqarpoq.**  
(Inatsisartuni ilaasortaq Peter Olsen Inuit Ataqtigiit)

**Inissiani pisortaqarfiusuni Namminersorlutik Oqartussat Kommunillu suliffimmi kalaallit eqqumiitsuliaannik kusassarneqartartussaaterlugit pisussaaffeqalernissaat pillugu Naalakkersuisut eqqumiitsuliornermik ingerlatsineq pillugu Inatsisartut inatsisaata allanngorteqqullugu peqquneqarnissaanik Inatsisartut aalajangiiffigisassaattut siunnersuut.**  
(Inatsisartuni ilaasortaq Aqqalu C. Jerimiassen, Atassut)

Siunnersuuteqartut Peter Olsen Inuit Ataqtigiit, kiisalu Aqqalu C. Jerimiassen, Atassut, siunnersuutaannut soqutiginarturnut qutsavigaagut imatullu Siumumiit oqaaseqarfigissallugit:

Siumuminngaannik pingaartilluinnarparput eqqumiitsuliortut ulluinnarni atugaasa qaffassartuarneqarnissaat, taamatut suliniuteqarneq ataavartumik ingerlasoq, aammalu sutigut allatigut periarfissaasa atorluarneqarnissaat eqqarsaatigalugit sammiviit sorliit piusut apeqqutaatillugit sutigut peqataatittuarnissaat pingaaruteqartutut isigigatsigu.

Sumulluunniimmi inoqarfimmut pilluni, arlaagut alutornartumik immikkuullarissumik takugaangatta ilutsigut alutorsarlutalu qiimmallaatigisaratsigu, ilaatigullu eqeersitsisinnaasumik misigisaqartaratta ilumoortumik arlaagut taamatut piginnaaneqartut sulii atorluarsinnaanerunnerannik tikkuussiffigineqartutut misigisarluta.

Taamatuttaaq pisortat suliffeqarfiutaat, imaluunnit kikkut tamarmik ornittagaanni arlaagut inip iluani kusanartumik iigaasa kusassarneqarsimanagerat alutornartumik piugaangat, isertunut amerlanertigut misigissutsikkut alapernaasernermillu pitsaasumik pilersitsisartoq ilisimallutigu.

Taamatut suliaqarsinnaasut qularnanngitsumik piffinni amerlasuuni piupput, ilaat ilisarimalluakkagut, aammalu ilarpassuaqarput avammut saqqumilaanngikkaluarlutik pikkorilluinnarlutik suliaqartartunik, tamakku aamma arlaagut suliaassanik neqeroorfineqartarpata qularnanngitsumik aamma pitsaassutsimik ajunngilluinnartumik pilersitsisinnaasut upperilluinnaratsigit naqissusiissaagut.

Siunnersuuteqartut eqqarsaatigalugit siunertaat ersarissuuvoq sanaartukkat /aammalu pioreersut silataanni, iluinilu eqqumiitsuliortut atorlugit kusassaasernerup ataavartumik piulernissaa



anguniagaasoq ersarippoq, tamannalu Siumumiit peqataaffigalugu taperserparput, tassami siunertaat ersarippoq suli annerusumik eqqumiitsuliat takussaatinneqartarnissaat anguniarneqarpoq, aammali taamatut kusanartuliornermi kina/kikkut suliaqarsimasut takuneqarsinnaagaangat, tamanna qularnanngitsumik suliaqarsimasunut pitsaasumik kinguneqarsinnaasoq takusinnaalluarparput iluarisimaarlugulu.

Naalackersuisut akissutaat eqqarsaatigalugu ilaatigut Tamat ornittagaannut kusassaasinnaanissamik eqqumiitsuliortunut inniminniisinnaanerat erseqqissarneqarpoq, tamanna soorunami inatsimmi piusuusoq ilisimavarput, tamatumalu atornissaanut pisortaqarfiit imaluunniit Kommunit namminneerlutik aalajangiisarnerat piusoq annerusumik apeqquserusunngilarput periarfissap pitsaasumik eqqumiitsuliortunut siunertaa ajunngitsuummat.

Eqqumiitsuliortut siammasissumik sumut sammisaq apeqqutaatillugu assigiinngissuseqarlutik saqqummertartut ilisimavarput, aammalu ilaatigut annerusumik atorluarneqarsinnaanerminnik oqariartuuteqartartut ilisimallutigit, ilaatigut maluginiarparput eqqumiitsuliortunut avataaneersunut mattussinnginnissaq Naalackersuisuniit oqariartuutigineqartoq, pillugu paasisinnaalluarparput tassami ilaatigut alutornassuseqartumik suliaqarnermi eqqumiitsuliortunut allanut aamma suleriaatsip siammarluni tuniluussinnaanerata piunissaa pitsaasumik siammarsinnaasutut isigigatsigu, kisialli soorunami nunatsinni eqqumiitsuliortut suliaqarsinnaasullu salliutinneqartarnissaat kissaatitut apuukkusupparput, aammali soorunami avataaneersunut ammatitsiuarnissaq naqissuserusullugu.

Naggataagut Naalackersuisut allannguutissamik siunnersuuteqarput, siunnersuutaallu naaperiutaasinnaalluartutut isigalutigu, taassumap ilanngullugu ataatsimiititaliami susassaqartumi suliarineqarnissaa, siunnersuutillu tamaasa taperserlugit tapullugit ataatsimiititaliamut ingerlateqqippagut.

Jens Kristian Therkelsen  
Siumut